

## МЕСЯЦА ФЕВРУАРИА ВО 8-й ДЕНЬ

ПАМЯТЬ ИЖЕ ВО СВЯТЫХ ОТЦА НАШЕГО ФЕОГНИЯ, ЕПИСКОПА  
ВИТИЛИЙСКАГО

### НА ВЕЛИЦЕЙ ВЕЧЕРНИ

На «Господи Возвах...» стихиры, глас 2-й

**От** юности усердно монашескому житию последовав, сосуд Духа Святаго явился еси, знамений же дар от того приим, вся научил еси презирати сладкая жития. Ныне же от божественнаго света просвещаем, просвети и наша мысли, отче Феогние. (Дважды)

**Егда** Святой Дух тя постави епископа Ветилии, отче Феогние, тогда яко божественный пастырь, верным предал еси закон спасительный благодати, и за них душу твою полагал еси, блаженне. Сего ради явился еси образ превыспренняго жития и исполнитель божественнаго Евангелия. Молися ко Владыце всех да утвердит верныя в православии и единомыслии, дарует миру мир и спасет души наша. (Дважды)

**Воссия** в тебе чудотворец Моисею подобный, святителю Феогние, град бо твой спасл еси от ярости волн, силою пожершагося на кресте морю повелев в пределы своя возвратитися, глаголя: «До сего креста дойдеши и не прейдеши, но в тебе сокрушатся волны твоя». Сего ради людие твои спасшеся от скорби, прославиша Бога, давшаго ти благодать чудес и исцелений. (Дважды)

Слава, глас 4:

**Егда** восхотел еси, преподобне, местом святым поклонитися, тогда ни пути долготы, ниже мест жестокость возможе разслабити, отче, теплоту к Богу шествия твоего. и тамо убо быв, и на местех возвеселився, идеже ноги ходиша Бога нашего, не нерадил еси отнюдь, дондеже достигл еси воздержанием и болезнями, и к Сиону небесному.

И ныне: Догматик, глас 4-й, или праздника

Вход. Прокимен дне. Чтения святительская 3:

На стиховне: стихиры, глас 8-й:

**Отче** Феогние, рабе благий и верный Господа твоего, делателю усердный винограда Христова, ты труждаяся собрал еси иноков

чреды, и напоив стадо твое водою живою, семя благочестия в людех сеял еси. И ныне радуяся Богу предстоиши, моляся со всеми святыми о спасении душ наших.

**Стих:** Честна пред Господем смерть преподобных его.

**Святителю** Феогние, разумнаго света заре, церковное светило, святительская красото, и иноческаго постнаго жития истовое правило: нам же заступник явился еси, свободждая от губителя врага души наша.

**Стих:** Что воздам Господеви о всех, яже воздаде ми.

**Святителя** великаго Феогния, како достойно воспоем, честнаго ума, богозарнаго света, освещающаго нас, и боговедение подающаго, таин глубинных исповедателя; согласно вси рцем: радуйся отче отцев, Феогние.

**Слава: глас 2-й**

**Отче** святителю Феогние, аще и на престол святительский возведен был еси, яко муж исполненный благодати, обаче образ смирения явил еси себе, сохраняя послушание и простоту жития иноческаго, яко хриstopодражатель. Егоже моли о душах наших.

**И ныне: богородичен воскресный, или праздника**

**Тропарь, глас 8-й:**

**Слез** твоих теченьми пустыни бесплодное возделал еси, / и иже из глубины воздыханьми во сто трудов у плодоносил еси, / и был еси светильник вселенней, сияя чудесы, // Феогние отче наш, моли Христа Бога спастися душам нашим.

**НА УТРЕНИ**

**На «Бог Господь...» тропарь святаго, глас 8-й:**

**Слез** твоих теченьми пустыни бесплодное возделал еси, / и иже из глубины воздыханьми во сто трудов у плодоносил еси, / и был еси светильник вселенней, сияя чудесы, // Феогние отче наш, моли Христа Бога спастися душам нашим.

**По 1-й кафизме седален: глась 4:**

**Подобен: Скоро предвари:**

**З**ванию Господа твоего последовал еси, мир отверг и вся яже в мире красная, всеблаженне, претерпел еси пустынное озлобление усердно, полки же отразил еси демонов мужественне. темже твою память присно песньми восхваляем верно. [Дважды.]

**Слава, и ныне: богородичен:**

**О**бновила еси чистая, божественным рождением твоим истлевшее страстьми земнородных мертвенное существо: и воздвигла еси вся от смерти къ жизни нетления. темже Тя по долгу блажим вси Дево препрославленная, якоже прорекла еси.

**По 2-й кафизме седален: гласъ 4:**

**О**т юности взем крест твой, благочестивно Христу последовал еси, увядив плотское мудрование воздержанием: темже на святительством седалищи сед святителю, возвеличил еси Владыку, и Того пречистую Матерь, различными дарованиями ты украсившая, Феогние богоблаженне. [Дважды.]

**Слава и ныне, богородичен:**

**Д**ево всенепорочная, пресущнаго Бога рождающая, со святителем Того непрестанно моли, оставление прегрешений и исправление жития дати нам прежде конца, верую и любовию поющим Тя по долгу, едина всепетая.

**По полиелеи: Величание:**

**В**еличаем тя, святителю отче Феогние, и чтим святую память твою, ты бо молиши о нас Христа Бога нашего.

**Псалом избранный: У**слышите сия вси языци, внушите вси живущии по вселенней.

**По полиелеи седален: гласъ 1-й**

**Подобен: Гроб твой, Спасе:**

**П**огребл еси страстей все востание умерщвлением плоти священный отче, жизнь безконечную по смерти приял еси: темже днесь Христова церковь празднует твою досточудную память, преподобных украшение. [Дважды.]

**Слава и ныне: богородичен:**

**Н**астави ны на путь покаяния, уклоняющихся присно к злым безпутием, и преблагаго прогневающихся Господа, неискусобрачная благословенная Марие, прибежище отчаянных человек, Божие обиталище.

**Степенна: первый антифон 4-го гласа.**

**Прокимен, глас 4: Честна** пред Господом смерть преподобных Его.

**Стих: Ч**то воздам Господеви о всех яже воздаде ми.

*«Всякое дыхание..»*

**Евангелие от Матфея (11:27-30)**

**По 50-м псалме стихира, глас 6-й:**

**Н**аследниче Божий, сопричастниче Христов, служителю Господень, святе Феогние, по имени твоему тако и житие твое: спросия бо седине богознание, свидетельствоваше светлость лица твоего душевное незлобие, извествоваше кротость, слова молчаливое, жизнь твоя славна, и успение со святыми: моли о душах наших.

**Канон святого, глас 8-й**

**1-я песнь**

*Ирмос: Воду прошед...*

**Б**лагими нравы украсився, Христу прилепился еси от юности, плотския страсти умертвивъ воздержанием, и к животу Преподобне преставился еси.

**К**репостию Христа возмог, державу низложилъ еси и силу вражию, и похвалу победных почести приял еси, преподобне Феогние, чудес сиянии.

**С**вышними лики яко святитель, яко Божий служителъ предстоя, о нас прилежно молися, получиши нам вечная благая молитвами твоими.

**Богородичен: С**вященный лик пророческий проявляше издалеца хотящую Тя быти Божию истинную Родительницу чистая, вышшую херувим и всея твари.

### 3-я песнь

*Ирмос: Ты еси утверждение...*

**В**ысотой смирения украшаем, свергн еси на землю велехвальнаго, изрядными делы твоими.

**У**готовив, преславне Феогние, душу твою храм Святому Духу, был еси наследник горняго царствия, съ вышними силами.

**И**мея поспешествующую тебе Божию силу, премудре Феогние, яко чуден, чудеса источаеши, и отгониши недуги.

**Богородичен: Р**азумети рождества Твоего чистая, неизреченныя глубины недоумет ум человекъ: Бог бо Себе смилив щедрот ради, во чреве Твоем всего мя обнови.

**Седален святого, глас 8.**

**В**оздержанием, и болезнями, и молитвами душу твою украсив боголепно, был еси сопричастник мучеником, блаженне, и чудес воистинну дары приял еси, еже исцеляти недуги верою чтущих тя. Темже и демонов отгоняя множества, подаеши исцеления человеком благодатию, богоносе Феогние, моли Христа Бога грехов оставление подати празднующим верою память твою.

**Слава, и ныне, богородичен:**

**С**лово Отчее Христа Бога нашего, от Тебе воплотившагося познахом Богородице Дево, едина чистая, едина благословенная: тем непрестанно тя воспевающе величаем.

### 4-я песнь

*Ирмос: Услышах, Господи, смотрения Твоего...*

**И**збран быв Господеви служити честному Евангелию, блаженне Феогние, во благоразумии люди учении премудрыми, отче, возрастил еси.

**Р**азумом Божиим обогащся, слово животное от сердца источил еси, напоая души оледевшия страстьми, премудре святителю Божий, Феогние богоблаженне.

**Г**лаголов и законов Божиих исполнитель быв, исполнился еси, отче премудре, божественных даров и чудес, и всем лучи богато испустил еси

**Богородичен:** Слово во чреве Твоем вселися без семени, и Человек явился совершен, обновляя естество боголепно, якоже Сам весть един, богоприятная Отроковице всенепорочная.

### 5-я песнь

*Ирмос: Утреннююще вопием Ти...*

**Ч**увственному змию сообитатель, в пещере небоязненно тому соводворился еси, отче, мысленных же змиев враждебныя главы сокрушая смирением твоим, Феогние.

**У**мертвив первее плотская мудрования воздержанием и труды, святитель божествен показался еси, и предстатель Святыя Троицы, всесвященный Феогние.

**Е**диницу несозданную богословил еси, тремя лица разделяему, непресекому и несмесну, просвещая благочестивыя священными богословии твоими.

**Богородичен:** Седяй в недрах Родителя неописан, в недрах Твоих, пречистая, ныне седит описан, Твоим обложен зраком, за спасение Адамле описан быв.

### 6-я песнь

*Ирмос: Молитву пролию ко Господу...*

**Я**зык твой Духом изошрен разумно, яко трость скорописца, написа в сердца благочестивых слово благодатное, всесвященне отче Феогние, Божиим мановением.

**Б**ожественным поучаяся, яко входя въ мысленная святая святыхъ, верных совершаеши Духом, Троическою зарею, блаженне Феогние.

**С**труями велений твоих заградив мутная нечестивых веления, яко река показался еси мирная, благочестия напоая соборы верных, святителю Феогние.

**Богородичен:** Вода еси неизчерпаемая Дево, от неяже вси пиюще благодати исполняемся, душею и телом насыщаеми.

### Кондак гл. 2

**Б**ожественный гром, труба духовная,/ веры насадителю, и отсекателю ересей,/ Троицы угодниче, великий святителю Феогние,/ со ангелы предстоя присно, // моли непрестанно о всех нас.

### 7-я песнь

*Ирмос: От Иудеи дошедше отроцы...*

**П**росвещаем благодатию Духа, яже к божественному мановению причащении, светодательная был еси звезда, просвещая мудре поющыя: благословен Бог отец наших.

**С**вятейшая церковь быв, озаряем добродетельными деянии, живущу имел еси в тебе, отче Феогние, Троицу несозданную, вопия: благословен Бог отец наших.

**М**ногоблезненные страсти всегда врачуеши приступающих к тебе: благодать бо преподобне приим от Господа содевати знамения и чудеса.

**Богородичен: Ново** Отроча рождаши пребезначальнаго Слова, обетшавшыя ны грехом, обновила еси Дево, и пети укрепила еси: отец наших Боже, благословен еси.

### 8-я песнь

*Ирмос: Богоглаголивши отроцы вь пещи...*

**П**роцвел еси в постнических удолиях прехвальне отче, яко шипок благоуханен, и якоже крин благоухал еси совести верных добродетельми и чудесы, темже преподбне, ожени от нас страстей злосмрадие.

**В**ладыце твоему подобяся, ярость волн морских укротил еси, отче, силою крестною. Темже град твой, Божия избавлься гнева, восхвали тя, святителю Феогние, яко чудотворца нарочита и заступника преизрядна.

**И**сцеления источаеши Божиим Духом, отче Феогние, и страсти многовременныя, отче, приходящих к тебе, и прогониши лукавыя духи, и воздвизаеши верныя восхвалити твоя светлыя подвиги.

**Богородичен: Избавльшеся** первыя клятвы Твоим Рождеством, преблагословенная Отроковице богорадованная, глась Гавриилов возсылаем Ти: радуйся, вина всех спасения.

### 9-я песнь

*Ирмос: Устрашися всяк слух...*

**Я**ко великое солнце нам, величием подвиг твоих возсиял еси и озарил еси, богомудре, вся земныя концы. Темже и умер прешел еси

от света къ свету возсиявшему; тем вопиеш ти: просвети наша помышления, отче преподобне Феогние.

**В** землю кротких ты вселился еси святителю, кроток и незлобив быв, с вышними совокупляясь воинствы: весь украшен добродетельными светлостьми, и светом добродетелей преодеян.

**З**риши Божия и ангельския светлости, патриарх и мученик, и апостольския красоты, моля съ ними человеколюбца, оставление грехов и жития исправление даровати нам, преподобне, хвалящим тя.

**Богородичен:** Просвети чистая Дево, сетующее сердце мое присно преступленьми, и житейскими многими молвами, не остави мене врагом быти в радость, яко да славлю Тя, и любовию пою препетая.

**Ексапостиларий: Подобен: Посетил ны:**

**С**лавно красится днесь светозарное торжество, во свете славы лица Божия предстоя, святителю Феогние, помяни насъ хвалящих твою память.

**Слава и ныне: праздника или богородичен:**

**Богородичен:** С Богом на Тя пречистая, упование возлагаем, иже из Тебе прошедшему сраспинаем Христу: Твоими же къ Нему мольбами невредимы даже до конца насъ сохрани.

**На хвалитех: стихиры, глас 6-й**

**И**збавлься високоумия и наслаждения, яже суть источницы греха, явился еси наставник смиренномудрия, сему научая не точию словесы, но и дела твоими. Темже почитая святую память твою, прославляем Христа тя венчавшаго. Отче святителю Феогние, моли Христа Бога спастися душам нашим.

**О**тче святителю Феогние, ты уготовал еси себе в жилище Святаго Духа, воздержанием, поучением и слезами себе очистив. Темже мнози приходяще к тебе в скорбех, с радостию отходяху, приемше утешение и наставление. Ныне убо обитая в небесных кровех, молися о душах наших.

**В** пещере вселился, в той небоязненно змию страшному сообитал еси, ядый хлеб и акриды и токмо воду пия, души твоей внимая,



очищая ю от скверных помышлений. Темже и равноангелен показался еси, отче святителю Феогние: Христа моли о очищении душ наших.

**Слава: глас 4-й:**

**М**ира презрев славу и богатство, отче Феогние, затворил еси себе в малой келии, юже и царскую палату нарекл еси. Возгнушався же мягких риз, облекся еси во одежду безсмертия и вместо сладкия пици пребыл еси постясь. Темже явился еси вождь ко спасению и наставник иноческих соборов, научая их словом, наипаче же образ тем быв житием твоим. Преподобне отче Феогние, присно за нас молися, празднующих честную память твою.

**И ныне: богородичен или праздника**

**Славословие великое. По трисвятом, тропарь святителя, Слава и ныне: богородичен или праздника. Ектении и отпуст.**

## **НА ЛИТУРГИИ**

**Тропарь святого, глас 8-й:**

**С**лез твоих теченьми пустыни бесплодное возделал еси, / и иже из глубины воздыханьми во сто трудов у плодоносил еси, / и был еси светильник вселенней, сияя чудесы, // Феогние отче наш, моли Христа Бога спастися душам нашим.

**Кондак гл. 2**

**Б**ожественный гром, труба духовная, / веры насадителю, и отсекателю ересей, / Троицы угодниче, великий святителю Феогние, / со ангелы предстоя присно, // моли непрестанно о всех нас.

**Прокимен, глас 7-й: Честна пред Господем смерть преподобных Его.**

**Стих: Ч**то воздам Господеву о всех яже воздаде ми.

**Апостол к Галатам (5:22-6:2).**

**Аллилуия, глас 8-й:** Блажен муж бояйся Господа, в заповедех Его восхощет зело.

**Стих:** Сильно на земли будет семя его.

**Евангелие от Луки (6:17-23)**

**Причастен:** В память вечную будет праведник, от слуха зла не убоится.

**Конец и Богу слава!**